



REPUBLIKA E KOSOVËS / REPUBLIKA KOSOVA

GJYKATA THEMELORE PEJË

Numri i lëndës: 2021:020539

Datë: 04.02.2021

Numri i dokumentit: 01475348

P.nr. 104/21

NË EMËR TË POPULLIT

GJYKATA THEMELORE NË PEJË D.P. , gjyqtari Sejdi Blakaj me sekretaren juridike Gjyljeta Çorkadiu , në lëndën penale kundër të pandehurit L. H. , sipas aktakuzës së PTH-së D.P. në Pejë PP/II. nr.305/21 të dt.04.2.2021 për shkak të veprës penale: të kanosjes nga neni 181 par 3 lidhur me par 1 të KPRK-së, pas përfundimit të shqyrtimit fillestar , publik dhe me gojë, të mbajtur në praninë e të pandehurit L. H. , mbrojtësit të tij av. Dukagjin Kërveshi nga Peja dhe të prokurorit të shtetit Sadije Muriqi me dt .04.2.2021, ka marrë dhe botërisht ka shpallë këtë :

A K T G J Y K I M

L. H., i lindur më, ne fshatin, KK, me banim në fsh. K. dhe në, nga i ati R., i martuar, ka të kryer fakultetin e kriminalistikes, i identifikuar me numër personal të letërnjoftimit, shqiptar shtetas i Republikës së Kosovës, gjendet në ndalim policor në afat prej 48 orëve nga ora. 18:00 dt. 02.02.2021

ËSHTË FAJTOR

Për arsye se:

Me dt. 14.01.2021, rreth orës 17:00, në, në rr.”.....”, me qëllim të frikësimit seriozisht e kanos te dëmtuarin-zyrtarin policor S. H. në lidhje me punën e tij, ne atë mënyrë që pasi i dëmtuari ndalon me veturë vëllain e të pandehurit dhe të njëjtit ia shqipton tiketën kundërvajtëse, i pandehuri përmes numrit të telefonit, e thërret të dëmtuarin në telefon dhe të njëjtit i drejtohet me fjalët **“kom me ta q... nanën ty dhe krejt familjes tënde, do ta vras gjithë familjen tënde dhe djalin tënd, unë nesër vi në Kosovë ti dhe familja jote do ta shihni se çka do të ju ndodh, sepse ti sot e ke rrahur vëllain tim”**, ku i dëmtuari bisedën e lëshon në interfon dhe të njëjtën bisedë e dëgjojnë edhe dëshmitarët-zyrtarët policor N. G. dhe H. R.,

- me këtë ka kryer veprë penale **“Kanosje”** nga neni 181 par. 3 lidhur me par 1 të KPRK-së.

Andaj gjykata duke u bazuar në nenin 38, 39, 46,47,48,49, dhe nenit 181 par 3 lidhur me par 1 të KPRK-së, të pandehurin i SHQIPTON ,

DËNIM TË KUSHTËZUAR

Në atë mënyrë që ia përcakton dënimin me burg në kohëzgjatje prej 6 muajsh , e të cilin dënim i pandehuri fare nuk do ta vuaj nëse në afat prej 2 vite nuk kryen ndonjë veprë tjetër penale .

Obligohet i pandehuri që në emër të paushallit gjyqësorë të paguaj shumën prej 15 euro , kurse ne emër te taksës për mbrojtjen e viktimave të krimit shumën prej 30 euro - të gjitha këto 15 ditë pasi që aktgjykimi të merr formën e prerë.

I dëmtuari për realizimin e kërkesës pasurore juridike udhëzohet në kontest të rregullt civil.

Shpenzime procedurale nuk ka pasur.

A r s y e t i m

Prokuroria Themelore në Pejë me dt.04.2.2021 kundër të pandehurit L. H., ka ngritë aktakuzë PP/II. nr.305/21, për vepër penale: të kanosjes nga neni 181 par 3 lidhur me par 1 të KPRK-së, duke i propozuar gjykatës që pas përfundimit të shqyrtimit gjyqësorë të pandehurin ta shpallë fajtorë , ta dënoj sipas ligjit dhe ta obligoj në pagimin e shpenzimeve procedurale .

Në shqyrtimin fillestarë i pandehuri – pasi që paraprakisht i është lexuar aktakuza , është njoftuar me të drejtat dhe detyrimet procedurale dhe pasojat e pranimit përkatësisht të mos pranimit të fajësisë- e ka pranuar fajësinë dhe ka manifestuar keqardhje për atë që i ka ndodhur. Këtë pranim fajësie gjyqtari – pasi që paraprakisht e ka marrë pëlqimin e prokurorit të shtetit dhe mbrojtësit të tij , i bindur se pranim fajësinë i pandehuri e ka bërë ashtu siç e parasheh ligji – vullnetarisht dhe pa u ndikuar nga askush dhe në asnjë mënyrë -e ka pranuar !

Meqenëse i pandehuri e pranoj fajësinë gjyqtari kaloj në marrjen e vendimit lidhur me llojin dhe lartësinë e masës ndëshkuese , me ç rast i pati parasysh të gjitha rrethanat rënduese dhe lehtësuese. Rrethanë renduese në rastin konkret gjyqtari nuk ka gjetur , kurse nga ato lehtësuese ka çmuar : pranimin e sinqertë të fajësisë e që është rrethanë veçanërisht lehtësuese , pendimin e thellë për këtë gjë, qëndrimin korrekt në gjykatë, moshën e re, kërkim faljen përkatësisht keqardhjen që ka manifestuar disa herë për rastin e ndodhur e në veçanti faktin se i pandehuri kurrë më parë nuk ka ra ndesh me ligjin por edhe faktin se , dhe kësaj gjyqtari mendon se edhe me një vendim si në dispozitivin e aktgjykimit ndaj të pandehurit do të arrihet qëllimi i ndëshkimit i paraparë me neni 41 të KPK-së .

Vendimi mbi shpenzimet e procedurës penale dhe të paushallit gjyqësor është marrë konform nenit 450 të KPPRK-së.

Vendimi obligimin e të pandehurit për taksat për programin e kompensimit të viktimave të krimit është marrë konform Ligjit nr. 05/L-036

Vendimi mbi udhëzimin e të dëmtuarit në kontestin e rregullt civil është marrë konform nenit 463 të KPPRK-së .

Nga sa u tha më lartë konform nenit 365 të KPPRK-së u vendos si më lartë.

Nga Gjykata Themelore në Pejë D.P. datë.04.2.2021.

Sekretarja juridike
Gjyljeta Çorkadiu

Gjyqtari
Sejdi Blakaj

KËSHILLA JURIDIKE

Kundër këtij aktgjykimi lejohet
Ankesa në afat prej 15 ditësh nga
Dita e marrjes , Gjykatës të Apelit në Prishtinë
E përmes kësaj Gjykate .